

30. april 2019

UPA 2019/194

Nunatsinni nioqutissat akiisa OECD-imi inuussutissat ulluinnarni atorneqakkajuttut naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissueqqullugit naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UKA2020imi nallertinnagu inatsisartunut saqqummiunneqassaaq.
(Inatsisartunut Siumup gruppiani ilaasortat).

Innuttaasugut tamatta ullut tamarluinnaasa eqqumaffigiuannartarparput illoqarfitsinni nunaqarfitsinnilu nioqutissat qanoq akeqarnersut. Aammalu assigiinngitsutigut malinnaavigisinnaavarput illoqarfinni nunaqarfinnilu akigititat aamma qanoq ittuunersut.

Oqartoqartarpoq nunatsinni pisiassat akisunerannut patsisaasut ilagisaraat immakkut silaannakkullu assartuinerup akisunerujussua.

Nalunggilluinnarparput nioqutissat pisiniarfinni pisiarisartakkagut amerlanerpaat Danmarkimeersuusartut. Taamaattumik aamma pisussaaffigaarput nunatsinni nioqutissiornerup qaffarsarneqarnissaanut aqutissiusseqataassalluta.

Ukiuni makkuna assartuinermut atukkat allanngortinniarnearput. RAL –p Danmarkimi umiarsualiveqarnikkut pilersaarutai nutaat Siumumiit pissanganartutut isigaagut. Isumaqarpugullu assartuinikkut ileqquulersimasut allanngortinnerisigut assarsuinermi akit appartinneqarnissaannik siunertaqarneq pissusissamisoortuusoq.

RAL inuiaqatigiit kalaallit pigisaraat taamaattumik suliniutai tapersorsorpagut. Suliffeqarfiit nunatta pigisaasa suliassaasa pingaarnersariuartariaqarpaat inuiaat kalaallit ulluinnarni inuuniarnermikkut atugassarisaasa pitsaanerpaaffimmiinnissaat.

Nunatsinni inuit ikittunnguugualarluta inoqarfeqarpugut amerlasuunik, taakkunungalu ilaallutik nunaqarfiit inukitsunnguit arlallit.

Maani nunami sumiluunniit nunaqaraluarutta nioqutissat akiisa tunngaviumik assigiinnissaat piumasaaqatigisariaqarparput.

Taamaattumik Naalackersuisunut piumasaaqatigissavarput tamassuma aamma eqqumaffigineqarnissaa.

Tassunga ilanngullugu eqqaamaqqussavarput nioqutissat ulluisa killeqartinneqarnerini, taassumalu kingunerisaanik qaangiisimasunut akikillisaasarneq inoqarfinnut tamanut atuunnissaa pimoorullugu nakkutigineqassasoq.

Nunaqarfimmiut illoqarfimmiullu aamma taassuma tungaatigut pineqarnerat assigiimmik tunngaveqartariaqarput.

Aammattaaq Siumumiit pingaartipparput misissuinermi nunap immikkoortuineersut assigiinngitsut peqataatilluarnissaat Naalakkersuisunit qulakkeerneqassasoq. Qularutiginnginnatsigumi sumiiffiit aallavigalugit misilittakkanik tunniussisinnaaneq uuma suliap pitsaanerpaamik inerpeqarnissaanut iluaqutaajumaartoq.

Naatsorsuutigaarpullu niuerneramik suliaqartut misilittagaat aallaavigalugit suliami uami peqataatinneqarumaartutaaq.

Taamaattumik Siumup aalajangiiffigisassatut siunnersuutaa sukumiisumik tigorussupparput qularutiginnginnatsigu innuttaasunut tamanut sunniutissai pitsaasuusut Nunatsinnilu oqinnerusumik inuunissatsinnut aqutissiueqataassasut.

Hermann Berthelsen
Siumut